

衍約說

二

衍約說服飾部第八

繒宜染色

望而知為劉氏

衣裳茵柁十年一易

欲壞清風

持布三端

郡圃種苧



服飾部目

服飾部

大美在躬德輝內蘊雖懸鶉而匪辱不文
繡以爲榮詩云維絺維絺服之無斁衍服
飾之宜約

繒宜染色

漢明帝永平三年立貴人馬氏爲皇后后援之女也德
過後宮既正位宮闈愈自謙肅好讀書常衣大練裙不
加緣朔望諸姬主朝謁望見后袍衣麤踈以爲綺縠就
視乃笑后曰此繒特宜染色故用之耳

儀天下者猶然如是况下此者乎今吳下婦女好
爲妖冶之粧千百年來風俗不改可爲三歎

衍約記服飾

一

望而知爲劉氏

劉忠肅公摯家法儉素閨門雍睦凡冠巾衣服制度自
先世以來常守一法不隨時增損故承平時其子弟雜
處士大夫間望而知爲劉氏

不難于父兄之教先而難于子弟之率謹

衣裘茵衽十年一易

唐韓滉雖爲宰相子性儉樸衣裘茵衽十年一易甚暑
不執扇所居無堂僅蔽風雨第稍增緝滉即撤去之

欲壞清風

王文正公嘗陪祀東封有子侍行家信至公發之見所
寄衣帶以紅爲之公怒曰我在爾已好華如此欲壞清
風我死望汝輩純素難也亟令送還而易之

持布三端

遼興宗嘗見張儉衣敝密令近侍以火夾穿孔記之卒不易帝問故對曰臣服此已三十年時尚侈靡姑以託諷耳上知其清貧出內府物令恣取儉止持布三端上益重之一日駕將幸儉第尚食先往具饌儉却之進葵羹乾飯帝食之爲加飽

郡圃種苧

楊誠齋子東山守吳夫人嘗于郡圃種苧躬紡緝以爲衣時年益八十餘矣東山月俸分以奉母夫人忽小疾既愈出所積券曰此長物也自吾積此意不樂果致疾今直悉以謝醫則吾無事矣平居首飾止于銀衣止于綉絹生四子三女悉自乳曰飢人之子以哺吾子是誠

行約說 服飾

二

何心哉

衍約說飲食部第九

酒以成禮

食不重肉

飲量過人

只是喫菜

梨棗輒引小者

日食萬錢

享用不可過

福當如是愛惜

不聽食肉

競爲慘酷

禮勤情厚

飲食部目

可損不可增

論菜

飲食部

食肉者鄙味道而腴與爲名動公卿以干
朱儒之飽無寧身栖衡泌以完山澤之癯
衍飲食之宜約

酒以成禮

左傳陳公子完奔齊飲桓公酒樂公曰以火繼之辭曰
臣卜其晝未卜其夜君子曰酒以成禮不繼以淫義也
好爲長夜之飲者彼何人哉

食不重肉

漢公孫弘爲布被食不重肉

按弘位在三公汲黯嘗斥其詐然故人賓客仰其衣

竹約說飲食

食者弘以俸祿給之家無所餘士亦以此賢之

飲量過人

張文忠公飲量過人太夫人年高頗憂之賈存道慮其
以酒生疾示以詩曰聖君恩重龍頭選公年高鶴髮
垂君寵母恩俱未報酒如成病悔何追文忠自是非對
親客不飲終身不至醉

只是喫菜

仇蒸然守四明與一幙官相得問公家日用幾何對曰
十口之家日用一千蒸然曰何用許多錢對曰早具少
肉晚菜羹蒸然驚曰某爲太守居常不敢食肉只是喫
菜公爲小官乃敢食肉定非廉士自爾見疎

食肉少許便謂定非廉士毋乃太刻但費至一千則

已奢矣然亦須于仰事俯育處分別觀之

梨棗輒引小者

漢孔融四歲時與諸兄食梨棗輒引小者人問其故答曰我小兒法當取小者

日食萬錢

晉何曾日食萬錢猶云無下箸處子劭日食二萬孫綏夜對機羨汰侈尤甚及永嘉之末何氏無遺種

享用不可過

樂善錄云昔太學二士人同年月日時生又同發解過省約就相近庶彼此得知災福後一人授鄂州教授一人授黃州教授未幾黃州者死鄂州者爲治後事祝曰我與公年月日時同出處同公先捨我去使我今即死

行和記 飲食

二

已後公七日矣若有靈宜托以告其夜果夢云我生于富貴享用過當故死公生于寒微未得享用故活以此知人享用不可過後鄂州官至典郡

享用之過居處服飾器用等項皆有之而飲食爲尤甚暴殄者所宜深戒故錄于此觀此并可不爲星家所惑

福當如是愛惜

唐肅宗爲太子時嘗侍膳尚食置熟俎有羊臂臠上顧使太子割肅宗旣割餘污漫在刃以餅潔之上熟視不憚肅宗徐舉餅啖之上甚悅謂太子曰福當如是愛惜不聽食肉

柳公綽性謹重歲飢飯不過一食諸弟子平時皆蔬食

曰昔吾兄弟侍先君爲丹州刺史以學業未成不聽食肉吾不忍忘

競爲慘酷

唐張易之兄弟侈于食競爲慘酷爲大鐵籠置鴟鴨于內當中起炭火銅盤貯五味鶩鴨遶火走渴即飲汁表裡迴熱毛落肉赤乃死昌宗以其法作驢炙昌儀用鐵楸釘狗四足喂鷹鷄肉盡而狗未死號叫酸楚不可聽易之過昌儀憶馬腸昌儀從騎跛肋取腸良久乃死後洛陽人鬻易之昌宗肉肥白如熊肪煎炙而食打昌儀雙脚折拗取心肝

禮勤情厚

司馬溫公言其先公爲郡牧判官客至未嘗不置酒或三行或數行不過七行酒沽于市殺止脯醢菜羹菓止梨栗棗柿器用瓦漆當時士夫家皆然會數而禮勤物薄而情厚近日士夫家酒非內法菓非遠方食非多品器皿非珍異陳列非滿溢不敢作會嘗數日營聚然後發書風俗頽敝若此公在洛文路公范忠宣公納爲直率會脫粟一飯酒數行詩云隨家所有自可樂爲具更微誰笑貧惜福養財有補風化不小

可損不可增

蘇東坡在黃州嘗書云東坡居士自今日以往早飯飲食不過一爵一肉有尊客盛饌則三之可損不可增夫召我者以此豫告主人不從而過是乃止一曰安分以養福二曰寬胃以養氣三曰省費以養財

論菜

真西山論菜云百姓不可一日有此色士大夫不可一日不知此味

衍約說 飲食

四

衍約說珍貨部第十

於陵子灌園

守錢虜

二疏請老

我乃逃禍

奢侈相高

碎琥珀以療金創

遺子孫清白

剖身藏珠

端明不愛錢

珍貨部目

珍貨部

厚于德者昌厚于賄者殃此古人以不貪
爲寶而勿取乎多藏以厚亡衍珍貨之宜

約

於陵子灌園

楚王聞於陵子賢欲以爲相使使者持金百鎰往聘迎
之於陵子終入謂其妻曰楚王欲以我爲相我今日爲
相明日結駟連騎食方丈于前子意可乎妻曰夫子左
琴右書樂在其中矣夫結駟連騎所安不過容膝食方
丈于前所飽不過一肉以容膝之安一肉之味而懷楚
國之憂亂世多害吾恐先生之不保命也于是子終出

竹約記珍貨

一

謝使者相與逃而爲人灌園

百鎰之金不能易其灌園之樂所見者高也子意可
乎於陵子豈有動于中乎蓋人非隱之難而偕隱之
爲難可乎一問夫亦聊以試之六爾

守錢虜

漢馬援有畜數千頭穀數萬斛旣而嘆曰凡殖財產貴
其能賑施也否則守錢虜耳乃盡散于親舊
具此識力自能超越尋常

二疏請老

漢疏廣疏受請老賜金遣歸日賣金置酒請族人故舊
賓客相與娛樂或勸以其金爲子孫立產業廣曰吾豈
老諄不念子孫哉顧自有舊田足給饘粥舊居足蔽形

體夫賢而多財則損其志愚而多財則益其過且富者衆之怨也吾既無以教化子弟不欲益其過而生怨又此金者聖主所以惠養老臣故樂與鄉黨宗族共饗其賜以盡吾餘日不亦可乎族人悅服

我乃逃禍

漢折像字伯式其先爲折侯因氏焉父有貨財二億家僮八百人像通京氏易好黃老言父卒感多藏厚亡之義盡散其金帛貨產施賑貧乏或謂像曰君三男兩女孫息盈前當增益產業何坐自殫竭乎像曰鬪于文有言我乃逃禍非避富也吾家殖財日久盈滿道家所忌今世將衰子又不才不仁而富墻隙而高其崩必矣吾是以薄其禍也知者服其超識

徐約言 珍貨

二

奢侈相高

晉後將軍王愷文明皇后之弟也散騎常侍石崇苞之子也二人皆富于財競以奢侈相高愷以糴澳釜崇以蠟代薪愷作紫絲步障四十里崇作錦步障五十里崇塗屋以椒愷用赤石脂帝每助愷嘗以珊瑚樹賜之高二尺許愷以示崇崇便以鐵如意碎之愷怒以爲疾已之寶崇曰不足爲恨今還卿乃令左右悉取其家珊瑚樹高三四尺者六七株如愷比者甚衆車騎司馬傅咸上書曰先王之治天下食肉衣帛皆有其制奢侈之費甚于天災古者人稠地狹而有儲畜由于節也今土廣人稀而患不足由于奢也欲時人崇儉當詰其奢奢不見詰轉相高尚無有窮極矣

愷絕嗣崇滅族孰謂天道之遠哉

碎琥珀以療金創

宋武帝性寡嗜好無珠玉紈綺之飾朝廷音樂未備殷仲文以爲言帝曰日不暇給且所不解仲文曰但屢聽自然解帝曰正以畏解故不習耳寧州獻琥珀枕價盈十萬帝大悅命碎之分賜北征諸將以療金創人服其識

畏解故不習語妙予以爲存此見地雖習終不解也若夫碎枕療創化無用爲有用較之焚珠玉于殿前者相去什伯矣

遺子孫清白

房彥謙爲涇陽令家有舊業所得俸錢皆以周恤親友雖致屢空怡然自得嘗謂其子玄齡曰人皆因祿富我獨以官貧所遺子孫在于清白爾

剖身藏珠

唐太宗謂侍臣曰吾聞西域賈胡得美珠剖身以藏之有諸對曰有之上曰人皆知笑彼之愛珠而不愛其身也吏受財抵法與帝王狗奢欲而亡國者何以異于胡之可笑邪

端明不愛錢

元城語錄載溫公營獨樂園園丁呂直性愚公以直名之春時人遊得茶錢十千一日來納公公曰此汝錢也可持去公命再三及怒方持之顧曰只端明不愛錢後十許日見園中新創一井亭問之乃前十千所構也

似相齟齬實乃融通

在內之珍貨

田

衍約說婚姻部第十一

人道之本

奇其清苦

舉案齊眉

不在貴族

賣婚

太平宰相

嫁不失時

不附宰相

勿慕富貴

斥去羅幔

烏羊爲禮

婚姻部

昏禮不賀人之序也合二姓之好以繼宗廟之後可不慎與古之嫁娶者首論其德次審其年百兩將迎乃重其禮也淫色則破義務飾則增侈行婚姻之宜約

人道之本

鄭氏曰婚姻乃人道之本古禮今人多違然須祛時俗陋習並遵文公家禮其嫁娶必擇温良有家法者勿慕富貴以妨擇配之義其豪強逆亂父母有疾者不可與議

奇其清苦

行約前 婚姻

一

後漢鮑宣妻桓氏字少君宣嘗就少君父學父奇其清苦以女妻之裝送甚厚宣不悅曰少君生富驕習美飾吾貧賤不敢當禮少君乃悉歸侍御服飾更著短布裳與宣共挽鹿車歸鄉里拜姑畢提甕出汲修行婦道
婦翁奇宣少君奇

舉案齊眉

梁鴻高節勢家傾慕多欲女之鴻並絕不娶同郡孟氏有不叩光壯肥而黑擇對不嫁至年三十父母問其故曰欲得賢如梁伯鸞者鴻聞而聘之女求作布衣麻屨織績之具後去吳依大家臯伯通居廡下為人賃舂每歸妻為具食舉案齊眉伯通聞而異之曰彼傭能使其妻敬如此非凡人也

不在貴族

虞翻與弟書曰長子容當爲娶婦遠求良氏足使生子天其福人不在貴族芝蘭無根醴泉無源

賣婚

山東崔盧李鄭家世衰微已無冠蓋猶負世望婚姻之間猶多邀錢幣人謂賣婚

此輩人既成姻家之後鮮有不爲其所賣者吾見其人矣

太平宰相

唐裴坦爲相性儉素其子娶楊收之女資給豐厚器用多犀玉坦見之盛怒命壞之曰殃我家矣收終以賄敗而坦號太平宰相

行約記 婚姻

二

嫁不失時

柳公綽姑姊妹姪有孤嫠者雖疎遠必擇婚嫁之皆淡泊曰必待資裝豐備何如嫁不失時

好在淡泊正恐難得此同志姻家耳

不附宰相

王義方魏徵異之欲妻以夫人之姪辭不取俄而徵薨乃取之人問其故曰初不附宰相今感知已故也不取好取又好魏公識力故自不同

勿慕富貴

司馬溫公曰凡議婚姻當先察其婿與婦之性行及家法何如勿慕其富貴婿苟賢矣今雖貧賤安知異日不富貴乎苟爲不肖今雖富貴安知異日不貧賤乎婦者

家之所由盛衰也苟慕一時之富貴而取之彼挾其富貴鮮有不輕其夫而傲其舅姑者養成驕妬之性異日爲患庸有極乎縱使因婦財以致富依婦勢以取貴苟有丈夫之志氣者能無愧乎

斥去羅幔

范文正公之子純仁娶婦將歸或傳婦以羅爲帷幔者公聞之不悅曰羅綺豈帷幔之物邪吾家素清儉安得亂吾家法敢持至吾家當火于庭

烏羊爲禮

孔淳之性高尚居會稽與徵士王敬弘爲世外之交敬弘以女適淳之子以烏羊繫所乘車轅提壺爲禮至則盡歡共飲迄暮而歸或怪其故答曰此亦農夫田父之

禮也

淳樸之風可嘉可則

衍約說喪葬部第十二

非苟為儉

以儉自完

隨家豐儉

喪葬部目

喪葬部

器有成必有毀物有始必有終喪葬者終焉之事也石槨金鳧則已奢爲烏螻蟻則已誕附身附棺勿之有悔道盡是矣衍喪葬之宜約

非苟爲儉

漢成帝永始元年昌陵制度奢泰久而不成劉向上疏曰黃帝堯舜禹湯文武周公止隴皆小葬具甚微其賢臣孝子亦承命順意而薄葬之此誠奉安君父忠孝之至也孔子葬毋于防墳四尺延陵季子葬其子封墳掩坎其高可隱故仲尼孝子而延陵慈父非苟爲儉誠便于體也上感其言詔罷昌陵反故陵

衍約說 喪葬

一

以儉自完

杜預卒爲遺令曰吾嘗以公事使過密縣之邢山山上有冢問耕父云是鄭大夫祭仲或云子產之冢也遂率從者祭而觀焉其造冢居山之頂四望周達連山體南北之正而邪東北向新鄭城意不忘本也其隧道唯塞其後而空其前不填之示藏無珍寶不取于重深也山多美石不用必集洧水自然之石以爲冢藏貴不勞工巧而此石不入世用也君子尚其有情小人無利可動歷千載無毀儉之致也吾去春入朝因郭氏喪亡緣陪陵舊義自表營洛陽城東首陽之南爲將來兆域而所得地中有小山上無舊冢其高顯雖未足比邢山然東

奉二陵西瞻宮闕南觀伊洛北望夷陵曠然遠矣情之所安也故遂表樹開道爲一定之制至時皆用洛水圓石開隧道南向儀制取法于鄭大夫欲以儉自完耳棺器小斂之事皆當稱此子孫一以遵之

隨家豐儉

倪文節公思云人家用度皆可預計唯橫用不可預計若婚嫁之事閒暇時子弟自能主張若乃喪塋倉卒之際往往爲浮言所動多至妄用以此爲孝世俗之見切不可徇只當隨家豐儉也

衍約說奴婢部第十三

冗食蠹家

此亦人子

忠信可任重其祿

不得自打

當取樸直謹愿

蓄婢妾之害

奴婢部

奴婢部

畊樵爲奴織纈爲婢以供使令而已而虐之而縱之皆非也彼夫嬌僮俊婢林立滿前堂上一呼階下百諾揚揚其意氣者亦獨何哉衍奴婢之宜約

冗食蠹家

日益編云蠹家莫甚冗食家衆勿容游手僕雖供給使令職課須度材分任雞牧掃績毋令惰曠務期各食其力此人事當然亦天道宜爾者

此亦人子

陶淵明爲彭澤令不以家累自隨送一力給其子書曰汝旦夕之費自給爲難今遣此力助汝薪水之勞此亦人子也可善遇之

律例言 奴婢

一

設語不多而無意不到

忠信可任重其祿

司馬文正公居家雜儀云凡男僕有忠信可任者重其祿能幹家事次之其專務欺詐背公徇私屢爲盜竊弄權犯上者逐之

不得自打

壽昌胡侔彥特之家子弟不得自打童僕婦女不得自打婢妾有過則告之家長爲之行遣婦女擅打婢僕則撻子弟

此法最善中藏許多作用蓋童僕婢妾雖係人須

養其廉耻之心而婢妾爲尤甚也

當取樸直謹愿

世範云家有僕從當取樸直謹愿勤于任事不必責其應對進退之快意而家之子弟莫知温飽所自來不求自己德業之出衆而獨欲僕者峭黠之出衆費財以養無用之人固未甚害然生事爲非皆此輩導之也

蓄婢妾之害

又云婦女多妬蓄婢妾者多無正室內有子弟外有僕隸皆當關防制以主母猶見他事况無所統轄以一人之耳目臨之豈難欺蔽哉暮年尤非所宜

後跋

前言往行不勝錄矣錄止此者何義取乎約也不約不足
以守也聖門能守約者莫如曾子子貢則博學而識
人也而一言可以終身行之一問其有反約之思乎學
者苟能守而勿失推類以盡其變則舉一反三不啻博
矣約云乎哉歲在上章闡茂之長至月敬書于竹林深
處讀書齋

衍約說畢

衍約記後跋



此書不著作者名姓要^比日有益
于身心之名言且刻于甚^精其為
南宋時人所作可寶玩也

嘉慶丙子三月廿日

安邑宋葆溥題



道光壬辰夏六月仁和許乃濟觀於
高涼巡署



道^上未八月十有九日析津王玉璋錢唐
張絳程晉同觀



道^上克丁酉鮑氏東方字^亦京
所披讀逾時真如書真其宋板
宋紙直加厚裝治^之東方其^亦京
藏



阮元書于京師^亦性^亦密

圖書在版編目(CIP)數據

衍約說.—北京:北京圖書館出版社,2003.10

(中華再造善本)

ISBN 7-5013-2289-9

I.衍… II. III.家庭道德—中國—古代 IV.B823.1

中國版本圖書館CIP數據核字(2003)第079283號

ISBN 7-5013-2289-9



9 787501 322893 >

書名 衍約說(全二冊)

出版 北京圖書館出版社(100034 北京市西城區文津街七號)

Tel:(010)66151313 Fax:(010)66174391

E-mail: Btfxb@publicf.nlc.gov.cn

Website: www.nlcpress.com

印刷 金壇市古籍印刷廠

開本 八

印張 一四

版次 二〇〇三年十月第一版第一次印刷

印數 一—二〇〇

書號 ISBN 7-5013-2289-9 / K·654

定價 四五〇圓

